


# Messadi dil parlament communal per mauns dalla votaziun all'urna dils 16 da matg 2021 pertuccont il credit d'impegn per la sanaziun dalla Via S. Clau Sura, Glion

Preziadas habitontas, prezias habitonts

## Situaziun da partenza e finamira

La Via Sontga Clau Sura a Glion sesanfla en in schliet stan. La davosa sanaziun totala ei stada avon quater decennis. Muort il fundament insufficient ed in'aulta frequenza da traffic ei la substanzia vegnida donnegiada. Entochen il 2017 s'udeva il tschancun tier la reit dallas vias cantunalas. Cun l'avertura dil niev sviamment Glion vest ha la vischnaunca surpriu quei tschancun.

El rom dalla procedura per la realisaziun da tempo 30 el territori dil marcau da Glion duei era la Via S. Clau vegnir integrada en quei perimeter. Quella mesira ei necessaria per risguardar las prescripziuns dalla protecziun encunter canera. El rom dalla sanaziun eis ei ulteriuramein previu da valurisar il sectur sin l'altezia dall'ustria Lukmanier cun la cruschada Via la Lutta cun mieds sempels aschia che la qualidad da star sil tschancun dalla via sa vegnir augmentada sco pierti dallas immobilias. Per dapli qualidad per ils pedunzs vegn era l'extensiuin dallas arcadas sin la parcella nr. 90/91 a procurar, talas vegnan integradas ella surbaghegiada planisada ed ein da financiar dils patruns da construcziun.



Illustraziun 1: Extract plan dil marcau da Glion.

Las lingias d'allontanar las auas da via ston vegnir renovadas e separadas dalla reit dall'aua piarsa. Il sistem da separaziun, ch'ei vegnius realisau cun la sanaziun dalla Via la Lutta, sto ussa vegnir menaus vinavon ella Via S. Clau Sura entochen il prefluent. Las lingias d'aua piarsa en quei tschancun ein per gronda part en in bien stan. Per quei ein restauraziuns ed extensiuns mo per part necessarias. La lingia d'aua denter la Garascha Spescha e la Via la Lutta ei ina dallas veglias ella fracziun e sto vegnir remplazzada. Adattaziuns vid il passapei e las lingias communalas daventan era necessarias muort ina gronda surbaghegiada sin las parcelas nr. 90 e 91. Per quella surbaghegiada ei era ina colligaziun per calira a distanza necessaria. Quei pretenda ina nova lingia ella Via S. Clau Sura denter la Via la Lutta e la parcella nr. 91. La finfinala basegna la Repower in'extensiun da sia reit da lingias en quei tschancun.

## Cuosts d'investiziun

Gener da lavur	Via	Aua tschuffa	Aua da beiber	Total
Project e direcziun da construcziun	65'000.00	9'000.00	10'000.00	84'000.00
Impressari	361'551.85	51'299.80	47'828.80	460'680.45
Sanitar			88'853.95	88'853.95
Catram	422'861.55	9'854.70		432'716.25
Different	74'786.60	6'845.50	15'067.25	97'449.35
<b>Total (incl. TPV)</b>	<b>924'200.00</b>	<b>77'750.00</b>	<b>161'750.00</b>	<b>1'163'700.00</b>

Il credit brut necessari per la sanaziun dalla Via S. Clau Sura a Glion munta a CHF 1'163'700.00 incl. taglia sin plivaleta. Per la via vegn ina procedura da perimeter menada atras.

## Lingias tecnicas da tiarzs

Las lavurs vid las lingias d'electricidad e las lingias per calira a distanza vegnan surpridas dalla Repower resp. dall'EWZ. Quellas muntan a strusch CHF 100'000.00.

## Finanziaziun

- Finanziaziun speciala providiment d'aua	CHF	150'750
- Contribuziun GVG providiment d'aua (ca. 7 %)	CHF	11'000
- Finanziaziun speciala providiment d'aua piarsa	CHF	77'750
- Procedura da perimeter (schazegiau)	CHF	270'000
- Mieds generals	CHF	643'200

Las investiziuns nettas da CHF 643'200.00 vegnan amortisadas sur 40 onns.

## Etappaziun

La sanaziun dalla via vegn realisada en treis etappas annualas ed ei coordinada cun il plan da termins dallas surbaghegiadas dalla residenza S. Giusep e talas sin las parcelas 90/91.

Per etappa duei la via tut tenor ladezia vegnir serrada totalmein ni parzialmein. Suenther il scarpar si suonda il remplazzament dallas lingias tecnicas cun lingia d'aua, lingia per calira a distanza, lingia d'allontanar las auas da via e lingias d'electricitad. Silsuenther succeda la cuvrada cun bischels avon che la rasada da fundament e la stresa da basa vegnan installadas. La cuvrada da catram vegn mingamai installada suenter in temps da spetga da rodund in onn.

Cuosts dallas singulas etappas:

2021:	CHF	256'500.00
2022:	CHF	312'000.00
2023:	CHF	<u>595'200.00</u>
<b>Total</b>	<b>CHF</b>	<b>1'163'700.00</b>

Tenor art. 31 lit. d al. 1 dalla constituziun communal schai quella fatschenta ella cumpetenzza dalla cuminonza dils votants all'urna.

Il parlament communal ha deliberau il messadi dalla suprastanza communal a caschun dalla sesida dils 31 da mars 2021 ed approbau la fatschenta unanimamein per mauns dalla votaziun all'urna.

## Proposta

Sin fundament dallas explicaziuns precedentas fa il parlament communal la suandonta proposta per mauns dalla votaziun all'urna:

- Per la sanaziun dalla Via S. Clau Sura a Glion vegn in credit brut da CHF 1'163'700.00 incl. in'eventuala carischia concedius.
- Eventualas contribuziuns da tiarzs vegnan deducidas.
- La suprastonza communal vegn autorisada da realisar la decisiun.

*Parlament communal Ilanz/Glion*